

Der Wendelin

Pst! Verrät* mich näd, daß ich was von Wendelin derzehlt ho, dar labbt nämlich nuch! Un wenn dar derfährt, daß ich sei Schträch aufg'schriem ho, nächer wärd dar fuchs-deifls-will und fucht'ld mit sei große Händ in die Luft rüm!

Also: Der Wendelin is Dodegrawer (Totengräber); früher wär er a klenner Bauer, ower wie sich die Säch mit dann Grewerschauf'ln gut ägelassen g'hot hät, dä hät'r sei Kühlich verkäfft un hät aa in die ännere Gottsagger dauß die Dörfer die Grewer g'schaufld. Bei die Leich hät'r öllës dirichiert un wenn die Leut nächer nei die Kärchn gānga senn, hät'r sich g'schickt, daß er es Groob widder zugebrächt hät. Ölla Granz un Blümaschträuß hät er schöö draufgelecht - un so mächt ersch heit nuch.

Amäl hät'r a älda Fraa müß beärdich. Walls ower dunten in die Arden so viel Schtenner g'ham hät, wär die Bläg zu arch un'r hät es Groob a weng zu kurz gemächt. Wie sa bei die Leich en Sarch noo läß wollten, is'r bloß auf die ee Seit'n nundergānga, auf die ännere Quärseit'n is'r henga gebliem un wär nächer so schreech dinna-gelohnt. Nāch die Zeremonie hät der Wendelin sein Bikl genumma un hät nuch a weng in Groob rümg'häckt, ower der Sarch hät nāt noo wöll rutsch. Dä is der Wendelin fuchdich worn. Ar hät sich auf'm Sarch g'stellt un is a paar Mäl fest g'hobbst un mit sei hoche Schuh draufg'stämpft un häd g'schrien: "Geh noo, äld's Luder!" Dä hät's en Rumbler gedān un der Sarch is noogeblumst - der Wendelin freilich a, ower dar hät scho gewißt, wie mer widder rauskümmt.

A ännere Mäl hät der Wendelin en Brief gricht von Finanzämt, ar söll aufschreib, woß er ei'genumma hätt, daß mer berachn könn, wieviel daß er Schteuer bezohl muß. Wie dä der Wendelin reagiert hät, wäß ich nāt, ower gedenk känn ich mersch. Gemächt hät er zeärscht gār nix. Ower wie die Wochn drauf in dann Schtedtla a Bürcher von die Hoddwoleh g'storm is, dä is der Wendelin schnur-schträcks nauf'm Rāthaus un hät g'socht: "Wall ich jetzt Schteuer bezohl söll, lech ich mei Amt äls Dodegrawer nieder!" - un nächer

hät er sich g'schickt, daß er zu die Dür nauskumma is. In Råthaus
müss'n sa arch verlach'n gewaßt sei; die hãm nämlich gleich be-
schloss'n, daß der Börchermäster sälwer nüwer'n Finanzåmt geh muß.
Dort hät'r a sofort mit'n Öwerscht'n verhånnelt. A Schtunn schpäter
is der Åmbsbot nunder zum Wendelin un håd g'socht: "Ålso, Wendelin,
brauchst kee Schteuer zu bezohn; mächs'da jetz die Grewer widder?"
Vo dara Zeit å kån der Wendelin die Grewer widder schteuerfrei
g'schaufl.